

馬

馬藏書

士

馬

藏

了

藏書

藏

書



圭塘款乃者御史中丞安陽許公與其季氏都司君
可行其客馬君明初及公之冢嗣國子上舍生楨間
居倡和之什也公謝事歸相城於其第之西二里得
康氏廢園薙灌莽刻榴翳廓然一新既又鑿池其中
表廣以步計者千餘深八尺形如桓圭雙洲右枕孤
島左峙夷堤緣烏回垣繚烏導渠西北峙其洩閘直
坤有崇臺西山在肘亦間繕完舊亭勝概方敵道在
其南梁于道之半池清見底魚潑刺可數於是汎池
有舟涉川有橋夫蘂楊柳棗栗榆梅榴桃杏蒼松
翠竹繁花豐草周於池之中外蓋培植踰年而後成
燠涼炎凍雖異候而生意源々娛目暢懷無時或間

惟二古檜歸然乃康氏故物公既甚愛之時杖屨携弟若子會賓友觴咏其間以池之占勝居多故以圭塘名而此倡彼和宮商遞宣少長同驩主賓相忘一草一木品題不遺故名其篇集曰款乃若漁歌互答然亦謙辭也都司君遂自為引哀為巨帙或傳至京師伯琦得而盡閱之詩古律五七言二百一十九樂府六十六摠之二百八十有五其中惟樂府十解馮明初所作餘皆公與弟若子一家所作也嘻何其盛哉惟賢人君子有濟世之偉業者必有絕世之高致蓋識見預定於胸中行藏一安於所寓蘊之豐則發之者益宏發之宏則蘊之者益豐矣古昔游賞之跡

若東山若綠野若平泉若輞川龍門其境未嘗不勝也或時有未偶或志有未遂或地非其鄉至於子弟之才美皆不見稱于世眉山蘇氏一門詞藻盛矣然用世未竟間闕嶺海莫年來歸各謀僑居未聞有燕集游覽之樂由是觀之功名之際家庭之間有不得兼其美者多矣獨安陽公以命世之賢際熙洽之運自處士時已負重望及居宰輔慨然以天下為己任迪德明謨培元氣植善類正色立朝將三十年天下陰受其賜而不知也年方耳順角中東第坐對桑梓泊然韋布園林池亭泉石之勝既甲一方而棟蓂芝蘭之輝映又英發杰出玩造化于品物暢情性于曩

倫家傳戶誦如獲親炙天下之美昔人之所未得者
遂魚有之然非受於天者厚固不能以具諸美非造
于道者深亦不能以一朝享也孔子曰精義入神以
致用也利用安身以崇德也用被于人德尊于己樂
行憂違無施不可非義精仁熟如吾安陽公者不足
以與于此伯琦從公遊非一日辱知最深故于圭塘
之詠推本而言之使知公者求公于樂山樂水之間
而不可與流連光景忘世徇情者論也謹書于款乃
篇什之端以見安陽公一門文物之盛至正十年歲
在庚寅七月既望鄱陽周伯琦叙

圭塘款乃并引

有孚

至正戊子秋吾兄中丞公以賜金得康氏廢園於相
城之西池陘亭圯垣堦卉木伐唯雙古檜在庀徒具
畚鍤從事疏鑿池廣袤餘千步深一仞形如桓圭西
楸二洲東規一島帶以平堤繚以周垣渠於乾艮以
時啓閉臺於坤維高可數丈西山岩麓近在目睫百
里之景可攬而有視亭之罅漏塙葺而牖之南為道
道中為橋十一月五日導水入池縱魚數千尾作樂
合賓友落成將橋於二洲舫水蓮於池柳於堤果
於亭側松竹花草於池南次第而時植焉昔人平泉
綠野吾不知其何如若是園者亦城西之佳地矣公

杖屨或氅衣或宮錦招佳賓挈子弟觴咏其間香山
獨樂不是過也公嘗謂池成當用晁補之摸魚子首
句買陂塘旋栽楊柳為樂府未幾明初馬先生擬此
以為公壽歡然即席和之命有孚同賦得二首池既
成載八賡韻通為十闋以成初意且呂為同聲倡和
張本公因題之圭塘款乃是池得嘉名矣然園有亭
臺命名紀寔則必待公為記焉

買陂塘旋栽楊柳詩翁急欲知務平生想像江湖意
幾度鷄鳴風雨鳧有渚直晚景桑榆才得烟霞嶼先
賢好語道鍾鼎山林神僊宰相從昔不同趣西池
路天意而今都許佳人協律調呂浮沉願入鷄豚社
其奈香山佳句誰我醕又菊節相推先約修花譜猶
今視古有涇水秋聲林慮爽氣壯觀我西圃
買陂塘旋栽楊柳山中道士家務豐年城市秋偏好
又近重陽風雨蘭汎渚雖信美江山不似吾雙嶼孫
兒學語說桑梓光陰松筠節操歲：有驩趣沙堤
路身退功成天許非熊夢斷占呂但教階下人如謝
解道春池新句尊有醕更不說傳家事業光吾譜衣

冠尚古有雙檜亭臺萬荷池治安我邠平圃

買陂塘旋栽楊柳平章風月專務歸來温樹無人問

但聽四窓荷雨圓作渚准擬似神仙瀛海烟波嶼凭

闌獨語笑元亮謀生秣多菊在帷識酒中趣 東華

路朝士從教推許廟堂議論如呂 謝學士序公文過集曰端承之翰林

亦嘗得預廟堂大議公于事有不可輒危言極論而畫其後當何如莫道夷簡不曾說來聞者為踈立而

今不說經綸話只辦城西聯句隣酒醕更乘興相從

香鼎并琴譜平生考古已散却黃金換回清福倚杖

看為圃

買陂塘旋栽楊柳園亭儘有公務東山更理間絲竹

莫用蒼生霖雨鷗鷺渚澹相對忘機不羨蓬瀛嶼平

生願語便泉石膏盲烟霞痼疾始遂隱居趣 邨郭

路老我頭顱如許黃粮何日逢呂斜川便是桃源洞

千載歸來辭向中流醕笑琴亦無絃何處求新譜茫

茫萬古任滄海桑田白衣蒼狗不到老農圃

買陂塘旋栽楊柳閑人有此忙務平泉綠野吾無羨

僅著一蓑烟雨舟泊渚更把釣觀魚宛在池中嶼掀

髯自語待月到天心風來水面笑領此時趣 堤邊

路鄙藥鄰翁相許阿蒙非復 呂西山如畫花如錦

專待公來尋句瓢挹醕聽奴唱樵歌高下從無譜何

須說古只待漏東華軟塵千尺應不到茲圃

買陂塘旋栽楊柳佳人屣輟齋務扁舟蕩漾亭深處

堪避片雲疎雨明月渚有仙子凌波解佩留芳嶼園
 了亦語道四美俱全二難巧遇杯酒易成趣 昇平
 相原與旌陽同許水雲身世希呂歸來却覓元真子
 不和岳陽樓醕斟柱醕悵瑶琴朱絃遺曲誰能譜談
 今援古聽無底詩囊有源詩派何必種芝圃
 買陂塘旋栽楊柳不妨三月農務溪翁走報新痕漲
 昨夜西山雷雨將沒渚有複道雙洲繚繞通孤嶼黃
 鸝對語正春色暄斫物華明媚好在浴沂趣 天涯
 路芳草茫茫如許蠻牋難寫心呂碧雲冉冉春波綠
 都是相思情句花共醕似梅與山礬臭味曾同譜堤
 陰樹古要亂絮漫空柔條蘸水慎勿折樊圃

買陂塘旋栽楊柳詩人何遜曹務水雲鄉裡看雲錦
 不羨落花紅雨如顧渚膾鮮鯽銀絲畫舫縈回嶼花
 嬌欲語任激灩荷觴淋漓宮錦痛飲是佳趣 虛閑
 地更有圖書如許坑炭追笑羸呂北窻一榻清風細
 讀罷羲文章句始置醕對避暑樓臺名畫宣和譜亭
 前檜古看黛色參天霜皮溜雨閑殺漢陰圃
 買陂塘旋栽楊柳新來已見山成務小山叢桂人如
 玉何用為雲為雨懷北渚悵渺：子懷目斷游龍嶼
 憑誰寄語正宗玉悲秋桓温種木妨我遠游趣 西
 風勁一鷗橫空何許匆：月又南呂崇臺迴出雲霄
 表好是登高題句時載醕却不似香山淚落琵琶譜

毋多讓古有黃菊青松寒香晚節吾不負吾圃
買陂塘旋栽楊柳英雄頗識時務老臣正欲彰君賜
未辨萬間風雨安石渚可無事爭墩吾自安吾嶼從
人浪語且雪後觀山鐙前飛蓋不動剡溪趣 西湖
夢却要扁舟來許何時命駕如呂對梅渾似蘇堤上
追和逋仙佳句茶當醕有佳客相遇刻燭論詩譜因
評今古自畫錦歸來觀魚軒後誰更問園圃

可翁和

明初賦摸魚子壽予既次其韵而可行和之成
什衰病技癢亦足為十首

買陂塘旋栽楊柳歸來此是先務他鄉故里都休校

舊雨不如今雨鴻在渚笑爾尚南飛吾已安孤嶼黃
花解語道人老宜秋身安耐酒此正有佳趣 鑿坡
路大手深漸燕許超騰又悖鍾呂但求閑澹如元亮
却恨詩多奇句傾綠醕底須按樂天池上霓裳譜休
論往古有三日重陽約君同醉老子築西圃
買陂塘旋栽楊柳閑官宜治閑務老天助我攻清澹
兩月不遭泥雨規別渚更累土為山留土分為嶼鄉
人共語歎百歲陸蕪一朝疏鑿此去日成趣 江湖
願自是平心許元英誰羨陳呂石渠細溜鳴琴筑清
似我家詩句杯引醕便收拾松風寫入絲桐譜區々
學古愧竊祿無功投閑有分猶患不如圃

買陂塘旋栽楊柳年來於此承務涼臺燠館吾何有
聊庇一時風雨洲映渚向一片烟波昂峙嵯峨嶼盤
空硬語挽三峽詞源千軍筆陣不盡樂閑趣 當年
志為國微軀曾許肯雲仍際觀呂從知弱步難勝重
夢斷九天臚句時飲醕趁四序栽花綴作園池譜長
歌弔古悵安得良田茫々萬頃種玉闌干圃
買陂塘旋栽楊柳田園忙勝得官務放魚種藕常無
暇移竹又當新雨由近渚駕一葉扁舟時復還吾嶼
花香鳥語況香上無縈眼前多景絃外有琴趣 尊
壘小能費人間幾許荷香惟欠仙呂天光雲影清難
寫盡日撚鬚無句池作醕要醉上通明傳取釣天譜

西山翠古任列壑爭譏攢峰竦諗難及野人圃
買陂塘旋栽楊柳塵凡皆與停務半生醉夢人間世
翻覆幾回雲雨歸有渚似真到三山縹緲紅雲嶼忘
懷笑語任白鷺驚飛蒼苔不掃去此便無趣 斜川
路宇宙茫々何許綺園肯附諸呂悠然一見南山後
便覺世多塵句持此醕論心事中間異姓還同譜迂
疎好古因執菊栽松滋蘭植蕙荒了種瓜圃
買陂塘旋栽楊柳散人不理他務柳栽近水應先綠
底用等閒霖雨遵北渚看雙檜蟠空倒影搖烟嶼千
言萬語只今日投簪經年閉戶便自得天趣 真男
子報國誰如張許論交仍負稽呂我今但要閑陶寫

幸免鏤章雕句村甕醕此真侶交梨火棗傳家譜庭
空樹古有野時來衡門不鎖清澈地僂圃
買波塘旋栽楊柳踈農未免多務一亭四序饒風景
且說但來春雨香濕渚愛新柳依稀數影連三嶼黃
鸝不語怕曲几團蒲坐忘未定驚破靜中趣功名
事却笑平生自許誰調陽律陰呂而今且向東君問
舊句豈如新句開騰醕要醉喚石湖重緝寒梅譜榮
枯自古趁九十韶華六句餘力終日醉吾圃
買波塘旋栽楊柳清風淨掃塵務柳陰已見疎成密
又聽綠荷敲雨鷗戲渚柰倏爾翻飛過崔嵬嶼形
神自語豈世事相縈機心未息物我不同趣池亭

小奴斂風烟來許漁歌何愧鐘呂水紋瓦影相娛悅
高詠退之佳句荷酌醕有一曲滄浪不犯人間譜悠
悠振古問誰侶吾儕攻迂習淡為水廢場圃
買波塘旋栽楊柳眼中已辨歸務柳成修榦蓮成實
均沐老天恩雨憐小渚敢氣象侵陵海上神仙嶼神
仙有語任涓滴蹄漈茫洋鯨眼各自適歸趣星々
鬢鏡裏衰容如許西風又動商呂九原宋玉悲何及
付與長歌短句飄泛醕縱不到箕山也是曾通譜希
賢信古看畫錦堂前霜天老月千載照韓圃
買波塘旋栽楊柳田家小々成務一年清景君須記
大勝草烟花雨冰泓渚把一片玻璃圍護瓊瑤嶼鈎

簾獨語是天富貧家地輸清供種：出竒趣

桑榆

樂造物而今已許一竿自昔歸呂圭塘款乃烟波曲
却屬腐儒章句尊有嶠是波若神湯世與詩同譜誰
能復古且池上觀梅鑪中煨芋燈下治書圃

明初和并序

中執法安陽公初度之辰賦樂府為壽以買陂
塘旋栽楊柳為首句為新得園池成公志也公
洎可行都司各和二首禎和二首既而可行董
浚築之役竣事復八庚韻公亦如之愈出而愈
竒有本者如是夫公命熙復廢而魁技窮矣搜
枯得九首并倡為十闕謹錄以呈伏希指教

買陂塘旋栽楊柳參知綠野機務春花秋月冬宜雪
夏有芰荷風雨停北渚更倚棹觀魚時憇東西嶼掀
髯自語任黃閣絲綸彤庭劍履未換涉園趣 人間
世多少高眠巢許勲庸終愧伊呂得閑宰相方為貴
誰識山中詩句觴玉醕看老鸛踔躩舞入南飛譜請
風萬古是舊隱晞韓新堂醉白香滿菊花圃
買陂塘旋栽楊柳參知老圃機務宰臣得請歸田里
久旱忽逢甘雨懷鄂渚悵黃鶴樓前鸚鵡翔烟嶼騷
魂可語柰信美江山無窮湖海難得故鄉趣 西園
地天意昔年曾許填麓近協音呂築臺浚沼方竣事
更辨雪兒佳句仍醕醖為禱余三家恐有治園譜今

吾勝古問孟氏芳鄰何時康樂何似東之圃
買陂塘旋栽楊柳參知圭沼機務石渠瀧々鳴西北
不用九天瓢雨魚在渚又戲藻翻荷遠遍方圓嶼魚
如解語道惠子忘言莊周忘象豈識水中趣 寒泉
上雲影天光如許高談曾會朱呂此中儘有源頭水
添我感懷新句姑却醮便合着葉嘉百卉雲仍譜心
源汲古任督井無波方塘好在餘潤及蔬圃
買陂塘旋栽楊柳參知三鳥機務出壺圓嶠千夫力
揮汗已能成雨鳧立渚着雨々胎禽俯伏紅雲嶼忘
機對語儘較短量長昨非今是未害老仙趣 山中
計長史詎能羈許糊塗政合晞呂交梨火棗如絨惠

何必雲林搗臼餅罄醮問玉醴金漿通我仙宗譜嘗
聞往古說舟近蓬萊風猶引去何處覓縣圃
買陂塘旋栽楊柳參知漁艇機務巨川冒涉風波險
此際纜烟維雨朝泊渚到日落蒼波移傍寒梅嶼翠
禽無語甚雪意方深月明空載獨棹始成趣 鑿坡
夢年少紛々權許科名更欲伴呂桃花浪暖多肥鱖
不識綠蓑詞句常載醮豈特與筆床茶竈聯文譜閑
忙今古是世上何人淵明日涉董子不窺圃
買陂塘旋栽楊柳池亭檢校公務團茅時復羲皇上
驚夢每勞窓雨東望渚却不是西偏略約連雙嶼于
時語：待柳色環堤荷香八座方足倚闌趣 園丁

慙直把廉名自許端如司馬家
呂十千護得簷前檜
莫詠蟄龍奇句誰酌醕試共看
東皋五斗先生譜
明當倣古要渠列箕疇
牖縣義畫學取晦翁圃

買陂塘旋栽楊柳平堤檢校公
務近來不用新沙築
履齒要深苔雨蘭藝渚植桂樹
團々宛在池中嶼堤
應怨語只有恨柔條無情飛絮
日與我同趣周垣

下杖策已蒙神許餽瓜何用懷
呂丈夫志不期温飽
愧尔碧紗籠句行且醕聽弦索
迎風吹入新翻譜由
今視古對草綠西湖裙腰一道
端合讓西圃

買陂塘旋栽楊柳飛橋檢校公
務當年題柱非無意
借用墨池元雨沱共渚早有路
潜通海上三神嶼歸

來笑語便玉蟾橫空金鯢跨海
安有野亭趣裴中
令別墅相師惟許倡酬聲應鍾
呂若教子午成丁卯
容得老漁尋句忙喚醕好淨洗
窮愁却與論詩譜西
風道古我欲繫匏瓜何在緱氏
已無圃

買陂塘旋栽楊柳崇臺檢校公
務西山遠獻千岩壑
揔解蓄雲藏雨臨淺渚更俯視
銀濤萬頃搖孤嶼姮
娥寄語約靜影浮光浴金沉璧
方領眺蟾趣登臨
地休逸主人先許買鄰邀我從
呂黃金鑄作千錢賀
不及無新句斟綠醕甚欲把園
亭草木隨時譜歌
幽驗古看祭韭條桑薪樗剥棗
納稼菜場圃
買陂塘旋栽楊柳夢中還理家
務十年不到衡山麓

孤負楚雲湘雨蘋映渚渺杜若江離香接烟霞嶼口
心相語為蠅驥東西雲龍上下誤却釣游趣 生平
志願識平輿二許煌々岳降申呂斐詞敬為先生壽
博得月章星句毋我醜只小草幽蘭心醉離騷譜松
存徑古待遊遍西園荷鋤歸去吾亦愛吾圃

楨和

買陂塘旋栽楊柳求田專理農務扁舟來往烟波裏
青箬綠蓑風雨時泛渚把遠岫遙岑收拾來孤嶼黃
花解語道鳳閣鸞臺黃塵烏帽爭似醉鄉趣 洹溪
上道士而今惟許飛熊夢斷姜呂水聲山色相縈繞
湧出筆端新句斟桂醕聽萬籟笙竽一派仙家譜休

論徃古向種菊籬邊觀魚軒外晚節有秋圃

買陂塘旋栽楊柳閑人忙過曹務山翁溪友來相賀
昨應夜時甘雨舟泛渚有茶竈相從同過東西嶼鷗
邊自語是午夢初回餘暇未解七椀得真趣 神仙
事雲海茫茫何許何人岩下逢呂詩家却有還丹訣
萬景點成奇句公自醜且山水徜徉莫考飛升譜悠
悠萬古看一片烟霞四時風物吾圃即吾圃

圭塘雜詠并序

有孚

圭塘亭臺浚築之役經始及落成有孚實皆與
聞吾兄時一來遊雖乘興忘返而芳春長夏秋
晴冬燠有孚獨得賞玩竟日不敢孤兄之賜謹

取日所為事各成小詩題曰圭塘雜詠用發長者一笑塘之可詠者不止此又當別撰拜呈
作樂導水

一部香山池上樂等閑誰遣到圭塘水聲更比樂聲好鳴玉激雲來未央

携妓落成

友郡守朱舜咨治其率寮來賀喜甚大醉而歸

皂蓋朱轡寮友隨池亭終宴不知疲笑扶紅袖山翁醉寧問街頭拍手兒

柳下聽鶯

陰、烟翠足潛身其奈嬌喉百轉新却憶當年閨闔

晚恩袍光照上林春

登第日唱名西宮密通上林嘗聞鶯也

舟中對鷺

風標公子雪衣裳來把蓮池野景教鼓浪鳴橈不驚去主人機事久相忘

荷觴酌酒

珍珠紅貯碧琉璃故摘新荷代酒卮看取持盈舊時手肯教宮錦笑淋漓

蕉葉題詩

綠映書窓兩樹蕉興來得句就揮毫何時更草間居賦却笑街頭紙價高

荷淨納涼

晚來池上據胡床荷葉荷花遠益香不待輕風來鼻

觀一襟煩暑自清涼

開窓看雨

白雨跳珠響翠荷秋聲剛比夜來多天公不破為霖
手捲地狂風可奈何時大旱連日雨作皆被風吹散

松陰獨釣

滿地松陰草似茵漁竿聊復樂吾真無端凡子忽相
過便說巖灘與渭濱

與客泛舟

青簾畫舫木蘭橈佳客來遊不待招莫話濟川當日
事且乘明月聽吹簫

日夕觀山

晚晴臺上看巉巖萬壑千峰起翠嵐恰似人間招五
老今宵有夢定江南

西堤晚眺

雪影天光隔小橋一亭如翼水週遭東隅不是西堤
好日照平林古塔高

雨中移竹

琅玕新綠滿亭臺雨後風輕手自栽玉立明年看新
笋凌雲會使鳳凰來

月下觀梅

月照新堤水見沙暗香浮處影橫斜詩人同愛多成
僻不獨西湖處士家

倚檻觀魚

魚我相忘樂可知
漆園仙老不吾欺
眼前無限濠梁興
獨詠鄉賢石刻詩

魏公有觀魚軒詩石刻

遶堤種菊

酒熟同招隱士看
飢來忍把落英餐
春風無限閑桃李
不似黃花柰歲寒

竹間開筵

陰分老翠濕分苔
洞府通幽一徑開
底用三三煩杖履
此中風月足徘徊

水口聽琴

潺湲石溜最宜琴
悵望佳人勞我心
誰識淵明琴外

趣只愁流水負知音

獨坐投壺

小童傳箭侍投壺
勝負無爭祇自娛
四面芙蓉風日美
絕勝客舍夜呼盧

登臺縱目

白雲飛處太行低
遠近川原望眼迷
西北蒼烟護喬木
佳城鬱鬱是洹溪

調白蓮始花

素娥乘月下陽臺
翠羽霓旌次第開
宴罷渚宮歸去晚
玉堆遺在碧雲堆

調木芙蓉不花

堤上芙蓉池內蓮
要看水木門清妍
雲舒霞卷知何在
目斷秋江思黯然

調湖石

嶄然山立勢巍々
岩岫封苔碧帶緋
幸免秦家鞭叱
苦從教雲去笑無衣

聽箏

雁柱參差銀甲輕
水亭虛敞助絃聲
從知不似南薰
譜且向尊前解宿醒

可翁和

作樂尊水

洄溪滾々源頭活
分得枝流入小塘
恠底凝雲吹不

散管絃聲滿水中央

携妓落城

一竿才空一曲隨
胼胝今日頓忘疲
年來懷抱須陶
寫敢笑長安眾富兒

柳下聽鶯

萬條金縷裊長身
勾引遷喬語意新
休向建章誇百
轉陶家門徑有餘春

舟中對鷺

禪定歛拳歛素裳
豈知船上載紅粧
主人有約君毋
忽多少魚兒要汝忘

荷觴酌酒

野人飲具謝玻璃自有天然軟玉卮
蕩漾翠濤擎不定有人謀笑縱淋漓

蕉葉題詩

騷鄉蘊楮寓芭蕉翠瑩尤宜運紫毫
風致于詩真有助卯君才調况清高

荷淨納涼

柳陰多處著方床萬柄無塵各有香
危坐悠然受清供風聲撼撼更秋涼

閒窓看雨

霎時清響鬧新荷其奈龍公不肯多
窓外風光吾不校四郊禾黍定如何

松陰獨釣

半世京華困鼎茵高風時復夢元真
可憐綠木求魚者今日君其問水濱

與客泛舟

款乃聲中動畫橈不煩舟子更相招
而今赤壁荒寒裏試問何人有洞簫

日夕觀山

林慮千仞翠岩々 畫工夫在莫嵐徒
倚崇臺觀未足紅輪西北月東南

西堤晚眺

小亭何用赤闌橋細柳新荷綠四遭
落日胡床更東

望碧天如水月輪高

雨中移竹

山人聚景作池臺移得龍孫帶雨栽
頃刻雲間晴日上便教陰過酒尊來

月下觀梅

空明雲水碧搖紗疎影尤宜竹外斜
為我殷勤謝僮父莫疑繁李玉川家

倚檻觀魚

魚樂江湖自不知非魚非我敢相欺
厄言我不如莊惠終日觀魚只有詩

遠堤種菊

紛紛紅紫厭相看老境才將羨倒餐
不向四堤皆種菊風霜誰與共高寒

竹間開徑

翠寒深處劇蒼苔香霧霏霏晚自開
從此一筇雙不借尋詩迎客幾盤徊

水口聽琴

幽棲長物一張琴時對清流自寫心
老子興闌童子去月明縣溜有遺音

獨坐投壺

綠陰清晝矢鳴壺慶馬何煩用酒娛
有主無賓聊一笑却呼僮僕煮皋盧

登臺縱目

老眼常疑萬象低
憑高遠景更淒迷
只從此地觀吾
圃便覺江湖是小溪

調白蓮

仙姿皎潔映圓臺
真見凌波恣意開
却是圭塘宜產
汝朝陽東照玉成堆

調木芙蓉不花

南土風宜陸地蓮
移根培植不能妍
壺間久絕司花
手却道殷韓是偶然

調湖石

一卷千古碧崔嵬
閱盡人間紫與緋
老子未能凡事

汝醉來聊用掛絺衣

聽箏

冰絃轟烈倚歌輕
絃外無聲復有聲
我自忘情聊過
耳幾人聞此發狂醒

槿和

作樂尊水

清泉百折來西麓
遠逐笙歌匯一塘
從此主人多樂
事源々如水共無央

攜妓落城

郡寮飛蓋遠追隨
觴詠臨流肯厭疲
一任東山多漢
妓夏家元是木腸兒

柳下聽鶯

聲似笙簧金滿身飛來應愛柳條新
遙知驚破幽人夢才信吾園有好春

舟中對鷺

泛舟逃暑謝冠裳愛爾蕭然水國妝
一縷風絲忽飛去眼前有句不能忘

荷觴酌酒

軟香誰琢碧玻璃捧掬兢強作
厄竟日罰多詩不就墨痕少似酒淋漓

蕉葉題詩

當年懷素種芭蕉髡却中山幾
鬼毫偶得青羅游戲

耳秋風攀桂仰天高

荷淨納涼

水雲鄉裏一蓑床萬綠亭
晚更香地勝境清煩暑盡更教漁笛弄初涼

開窓看雨

紛々銀箭射新荷添得陂塘景物多
回首林慮真水墨一窓其奈萬山何

松陰獨釣

龍蛇影裏藉莎茵一線清風畫不真
眼底得魚鮮可食山巔何似水之濱

與客泛舟

忘形談笑任停橈
邂逅寧煩折簡招
我欲扣舷誰我
和吾舟有客却無簫

日夕觀山

亭西咫尺聳千岩
清氣侵凌湧碧嵐
紅日欲沉山更好
從他捷徑在終南

西堤晚眺

聞說平泉與午橋
興衰自與世相遭
柳堤雖比沙堤小
莫景相從此最高

雨中移竹

踏泥穿徑接崇臺
劖破蒼苔特地栽
我得此君心事
了從今俗客不須來

月下觀梅

老樹清溪映白沙
可人竹外一枝斜
黃昏信步前村去
香到松林賣酒家

倚檻觀魚

濠梁樂意幾人知
魚自知魚官自欺
莫說銀絲鮮鮓膾
波神應怪杜陵詩

遠堤種菊

東籬疇昔笑相看
培植今非為夕餐
但與此堤同晚節
九天霜露任清寒

竹間開徑

翠陰穿漏地無苔
涼氣疏通一徑開
要與此君常接

迹杖藜初不厭紆回

水口聽琴

琮琤鳴玉已如琴更拂水絃為洗心我識子期千古
意直教流水有餘音

獨坐投壺

消閑偶爾得全壺心手相忘亦可娛窓外山禽忽驚
起握籌因得笑胡盧

登臺縱目

碧雲冉冉雁行低望斷郊原思欲迷隱々玉龍飛舞
處恰知流派是前溪

調白蓮

水仙拭面出妝臺渚務汀烟撥不開愧爾多情慰貧
索滿池融作爛銀堆

調木芙蓉不花

橘不逾淮况木蓮爾居非地敢爭妍江南八月花如
錦却是天機出自然

調湖石

紛々乔木簇峩嶷柳亦拖藍棗亦緋獨爾堅頑無用
處只從烟雨老苔衣

聽箏

弭風清入玉纖輕翻作雲間鸞鳳聲不用捋鬚興感
慨且圖醒却一朝醒

酒間得口號廿八字

可翁

郊君為我鑿圭塘荆芥化為雲水鄉昨夜荷香新雨
過一年勞費盡銷忘

有字和

檜影蟠空荷滿塘錦鄉還勝五雲鄉須臾一曲棹歌
起四座清風暑亦忘

楨和

柳陰荷氣滿池塘好景天留在老鄉翁自無心聊復
爾誰教魚鳥亦相忘

侍飲圭塘賦律詩并和韻二首

楨

人間何地不驕陽今日池亭願始償四面綠楊籠碧

鮮一池翠蓋擁紅妝松搖天外風聲細竹影窈間雨
氣香莫問為霖蘇大旱醉眠且得一宵涼

習池自合醉高陽酒債從今未易償花白好從陶令
社冠金休羨蜀宮妝雨聲瀉出九天譜荷氣鍾成百
和香頭上黑雲真有意要催詩句助清涼

翁用楨韻二首

城西風物擅安陽鄉社而今債已償自笑衣冠成野
逸更從花柳看時妝酒沾松露涓々冷詩入荷風字
字香莫道年來無事業等閒成就一天涼

半畝方塘學紫陽道心未瑩賞心債蝶飛已悟三生
夢蓮褪猶存半面妝四座賓朋連日醉一朝風雨滿

城香人間政爾愁炎暑誰信吾亭有許涼

叔和楨韵并序

至正己丑歲相城春夏不雨旱既甚六月廿九日始雨入夜沾足吾兄乘機輿挈壻姪來圭塘縱觀樂甚猶子貞具撰且有詩兄謂有字曰詩雖不高其意可取遂走筆答之有字亦技癢弗禁依韻得四首兄載賡之楨亦自和共八章觴詠間作于荷聲樹色中不謂此身之在塵世也時東平孟冬起來尹安陽方走神詞致懇禱甘澍適應尤可喜也故并及之

水雲身世本純陽八座仍教宿債償且對風光留客

飲誰教雪景待人妝芭蕉題字詩偏好荷葉為杯酒

亦香却笑紛、輕薄手等閑翻覆變炎涼

階下戎葵識向陽平生心事未全償池邊風雨生秋

意林下衣冠稱道妝三徑不荒松菊茂一亭渾貯芰

荷香仙翁命駕來聽雨未許北窓專此涼

買得園亭位面陽百年心事一時償風吹楊柳回鸞

舞雨浥芙蓉墮馬妝相下未成真率會洛中空記姓

名香當時太液池邊宴不信人間六月涼辛巳之夏吾兄以左

轄被命留京師遵故事率留守臣登廣寒殿視罇漏適御酒至恭宴池上有長句故及之

炎光只尺又秋陽生意才將一兩償學圃幽人乘逸

興凌波仙子競新妝三生不負林塘夢滿座驚聞翰

墨香為語安陽新令尹塵氓先荷此宵涼

太常引四首七月十九日賦

可翁

圭塘種藕已多時貼水曉星稀生意一朝回便萬柄
紅酣綠軟連宵驟雨透空繁響清絕不容詩對景
寫襟期要無愧鴟夷子皮

幽人早起赴池亭看初日照娉婷風蓋露珠傾又勝
似前時雨聲水沉香裏錦雲深處雙檜插天青一
葉釣舟輕似野渡無人自橫

四堤楊柳接松筠香破水芝新羅襪不生塵笑畫裏
凌波未真紅雲縹緲清風蕭颯半醉岸烏巾不是
葛天民也做得江湖散人

雲舒霞卷萬妝濃倒影水天紅江轉小臺東又一種
娟玉容仙肌綽約奇芬清遠搖動水晶宮一笑
對衰翁好同赴廬山社中

有字和

藕花無數半開時池上客來稀杖履獨徘徊忽翠蓋
因風盡歌天工妝景水神輸供陶寫費新詩身外
香難期笑士價才堪五皮

綠衣持節擁亭玉音萬娉婷一見寸心傾任詩畫
無聲有聲新篁搖葆蒼松張蓋山色入簾青雲淡
午風輕看樹影西窓又橫

水紋湘簟織霜筠座客句清新何物是紅塵更着個

漁舟寫真 趙公琴鶴謝家絲竹澆酒又陶巾不獨
太平民好鳳閣鸞坡舊人

靚妝仙子謝纖穠獨立水雲紅綽約畫闌東似姑射
肌雪容 翠盃承月玉杯擎露粲 蕊珠宮真賞有
鄰翁盡添入霓裳曲中水

楨和

池亭荷淨納涼時四面柳依稀棹得酒船回看風裏
紗巾半歌 殘霞照水夕陽明樹天付畫中詩應不
負歸期更誰看桃花面皮

西池上好新亭紅翠門娉婷翠蓋幾番傾聽水上
紅妝笑聲 歸來鄉社不閑塵事活計問樵青世事

一毫輕看西嶺晴雲莫橫

藕花香裡有叢筠照水綠稍新清潔出風塵似特與

幽人寫真 門無俗客地多清興羽扇白綸巾甘作

太平民敢自謂羲皇上人

淡妝素服更纖穠清致不須紅貯目畫橋東一掃盡
人間治容 麻姑何在嫦娥昨夜飛出廣寒宮天亦
為詩翁把好景都移此中

圭塘獨坐賦四律

可翁

我作圭塘未及年眼中生意浩無邊三秋未半荷沃
若一日不來心歛然自古人生求適意只今先務是
歸田管絃何似塤箎韻此去新詩幾百篇

西郭園亭近市塵市塵雖近足風烟陶家事業惟栽
柳周子襟懷託愛蓮莫向人間為白眼試從水面照
華顛悠々千古滄浪意時上扁舟自扣舷
我屋來西圃輪蹄二里遙晚風收菡萏秋雨長芭蕉
有酒容開口無官免折腰柴門莫堅閉恐負野人招
地僻心逾遠詩多意轉長陰森穿竹徑甘脆剝蓮房
魚長已堪釣醅香先自嘗敢言誇畫錦聊復此圭塘

有孚和

天與安閑未老年杖藜無日不池邊古存兩檜待真
賞瑞毓雙蓮非偶然但要遠籬皆有菊從教負郭却
無田和陶未盡登臨興更誦南華內外篇

池上新亭僅一廬池中風物飽雲烟底須太華峰頭
耦且對匡廬山下蓮飲酒有時如白醉揮毫無用效
張顛扁舟盡日橫秋水客至何因暝戛舷

小酌西堤上松陰曲徑遙竹金搖翡翠杯玉碾芭蕉
雨急添池面舟閑纜樹腰嬾書無折簡佳客不須招
林泉風景別山色與雲長酒友招元亮仙游憶子房
鱸鮮銀細鏤粳熟雪初嘗自愧無佳句其如負此塘

楨和

一束辛勤四十年神功收斂老溪邊高牙大纛皆
爾野服黃冠任自然但得睚心多勝槩肯因餬口望
良田圭塘此去無他事與客日談秋水篇

甘作村氓受一塵林塘花竹隔人烟四圍水色涵秋色一片紅蓮間白蓮倦矣且歸從所好老來雖醉不成顛採菱有曲聲清越不覺頻敲畫舫舷

日涉宜成趣行、不憚遙在途紆百折心事付三蕉日射花明臉風來柳折腰水雲深處好舟子又相招事去心猶在閑來日更長願治韓相圃誰羨贊公房蕭散今方得艱難昔備嘗天公知此意返照媚橫塘

漫書

誰謂予多蹇年來儘遂心作池通活水栽竹植連陰景物源、出門慵步、深從知非大隱有此小山林

有孚和

生意觀池上天其慰我心瑞蓮開並蒂新橋作繁陰題品詩方進栽培歲未深當年朝市夢曾到此雲林

楨和

構築非觀羨幽棲要賞心芟荷宜晚松竹共清陰風物四時好烟波幾許深白蓮開爛熳誰復憶東林色

有舟

可翁

有舟維老樹欲動恐傷蓮遂使成虛器何由濟大川錦雲香捧擁烟月澹流連泛、行無礙霜清八月天

有孚和

憶昨為舟日初非為採蓮衣冠懷赤壁泉石問伊川涉險平生屢投閑幾月連浮生身立似行止敢違天

楨和

畫舫將烏用圭塘為看蓮不教橫野渡且免涉長川
荷礙行還止萍開斷復連乘槎如有路相伴去朝天
大雨兩晝夜僮報墻仆而竹甚茂喜成可號可翁
一徑銀河瀉欲乾桑田幾侶海漫漫岸顏墻仆吾無
憾栽活蒼筤數百竿

有孚和

水溢仍須慮旱乾此君生意始澶漫朝來喜造菁
徑其奈平原水數竿

楨和

逐婦鳴鳩叫欲乾雨聲長夜共漫漫已添方沼水三

尺洗出穿雲玉萬竿

雨後觀竹乃有陸塾摧折者數叢因用前韻可翁

憶昨移栽怕雨乾豈期平地水瀰漫此君於我真無
負摧折猶堪作釣竿

有孚和

后土泥深若未乾幽人無寐徂漫漫此君摧折真堪
惜賴有虹霓尚可竿

楨和

從來植物怕枯乾平地誰教水盡漫叢篠岩墻偶然
耳釣鰲吾自有長竿

新秋即事

可翁

莫踏蒼苔破茨門畫亦閑林風秋入樹波日晚搖山
原野蒼茫外烟扉指顧間更須安一榻月夜不須還
有孚和

池亭殘暑去樂事日相閑徑列霜前菊窓招雨後山
好詩來枕上爽氣滿人間極目崇臺晚遙天一鶴還

楨和

西園無俗客盡日掩柴關柳岸行觀水松窓卧看山
功名付身外天地寄杯間目送行雲去翩々倦鳥還

秋陰

可翁

秋陰宜沼上鮮翠不曾乾聽雨朝歌枕觀雲莫倚闌
地寬人自在松茂竹平安天遂閑中樂年豐酒不難

有孚和

雨止雲猶密尊空硯不乾郊原誰植杖臺榭我凭闌
景侶人增勝閑知夢益安賦詩因調笑倚和羨才難

楨和

水面波紋定堤傍土脈乾清風雙鼓棹薄莫一憑闌
綠野思裴度東山訪謝安及辰行樂爾在路任艱難

漁家傲四首歌圭塘四時也可翁

水盡泉香雲縹渺韶華隱々浮林杪酒在葫蘆魚在
沼清畫悄好音時復來黃鳥管領風光心未老衰
顏却怕清波照有酒可斟魚可釣能事了東風一曲
漁家傲

窓影修篁搖翠葆
牆陰幽徑連芳草
驀地雨來荷葉
開香更好亂烟浮
動紅雲島
禪柳千條絲嫋
邊宜着蘭舟小
世態紛紛何足校
杖桂棹烏且和

漁家傲

露洗璇穹青杳
年光紅入灘頭
蓼翠蓋撐烟吹半
倒霜信早一區寒
影磨清曉
早是軒扉塵不到
好山更與供登眺
酒債漸多詩債少
翻水調西風幾疊

漁家傲

落日崇臺寒力峭
登臨恰是尋安道
有竹何人能徑
造吾不謂相逢要
遂掀髯笑
雙檜凌空龍天矯
有知定訝人枯槁
珍重歲寒冰雪操
君自寶老夫且唱

漁家傲

有孚和

莫訝圭塘春縹緲
要知生意從冬杪
柳動長堤水泮
沿庭院悄舊巢又
見來系鳥
九十韶華容易老
鏡中勲業慚頻照
招飲便須忙罷釣
休醉了東君要聽

漁家傲

濃綠園林光莫葆
詩翁只愛窓前草
驟雨常過蛙又
鬧亭館好日長人
在蓬萊島
風度新松聲嫋
酒酣却笑瀛洲小
柳外河邊休計較
皆可棹采蓮人和

漁家傲

雲外賓鴻聲漸杳
羈人聽罷如嘗蓼
我對清尊時復

倒風露早黃鸝果是能催曉
蓮褪殘妝涼乍到水
天一色供遊眺短笛悲秋知者少
吹別調新翻商意
漁家傲

雪後西山崖壁峭奇觀難與他人道
煨芋有爐無客
造從壑謂巡簷且索梅花笑
冷蕊疎花開矯々水
村妝點霜林槁賴有此君同節操
成二寶淺斟低唱
漁家傲

楨和

青入西山烟渺々天機只在菰蒲杪
風解水漸融小
沼人靜悄一聲何處啼山鳥
杖策尋芳逢野草
芽柳眼明殘照歸到圭塘還獨釣
心事了蕭聲暖
和

漁家傲

象綠初生如羽葆池光搖漾連汀草
紅杏已無春意
開風致好水中三嶼如三島
荷葉如錢蒲嫋々石
渠靜聽泉聲小從此圭塘時檢校
停短棹柳陰高唱
漁家傲

鴻雁翻々雲路遙蘆花如雪迷紅蓼
荷葉不禁風雨
倒秋意早詩懷清侶霜天曉
獨掩柴扉誰得到高
臺日莫宜瞻眺清致日多塵事少
歌古調新聲移入
漁家傲

萬木凋零岩壑峭一機消長觀天道
松竹園亭時一
造誰敢謂敲冰煮茗共談笑
自負平生心矯々三

問何事形容槁琴到無絃誰與操懷我寶相逢且賦
漁家傲

瑞蓮歌并序

有孚

圭塘落成之明年七月既望吾兄中丞公與客
小集塘西南雙洲前產瑞蓮駢花亭、異蒂同
附殆陰陽和氣鍾為禎祥天以慰老臣錫眉壽
而昌子孫也惟公高科起家致位丞弼贊化機
培善類三十年矣謝事來歸田不足供伏臘而
林塘栽植竭力資之蓋欲靜觀四時生意之妙
與造物者遊而積善餘慶吉事有祥嘉瑞之見
理亦宜哉有司欲以上聞公退然不居而好事

者繪為圖矣有孚退而閱史唐開元至宋紹興
四百年間僅十七八見表箋歌頌遙湧沓作
雖不奏祥瑞乃公素心然游詠至和詠歌太平
不可無也乃為之歌曰

圭塘活水分清洹主人嗜好同先賢蓮根培植未逾
歲孰為一旦生嘉蓮初疑霞臉影附鑑又似絳幘了
分鬢幻成彩鳳翼自比琢開香玉環仍連李唐日來
具圖表趙宋奏賀尤駢闐我元聖德極涵育瑞應只
許書有年嘗思至正辛巳夏吾兄實握綱轄權廣寒
殿下太液池亭、並蒔薰風前守臣有請願馳獻獨
以義折煩便、歸來對此蹄涔水肯將異卉誇里塵

吾鄉自昔好多士諸君巨筆如修椽僉言此是閭里
榮歌詩脩與圖俱傳身閑意適物寓園林何必皆
平泉天公端為表餘慶緒日與絲絲蓮房有子
風味好不待食藕沉痾痊願言七澤均此瑞主人福
壽方如川

可翁和

相攸西郭濱吾澹老病疑退非遺賢平生竊慕君子
德池上種竹池中蓮分何獨出奇異聯房蕊簇金
絲鬢二妹同體面目別七澤移種根株蓮書祥史籍
見歷走觀士女來闌人言培植久方盛一泓疏
鑿未及年自知不作駭俗事茲烏誰握生發權形容

敢勝周子說胚暉又在太極前亭照影欲輕舉凌
波微出俱輕便倦遊夢不到玉井歸來老屋安一塵
小池偶爾薙蕪穢池上樊亭才數椽酒從鄰貫已多
債詩取意適誰令傳天公特與慰岑寂嘉瑞湧出如
源泉郊君有倡阿買和僮歌况復清且絲擬為表頌
僭歸美奈此嬾痼誰能痊予心真樂更多有傍花隨
柳在前川

楨和

太行山下溪名澶溪主人今得賢石渠分溜入方
沼種出萬柄紅白蓮就中一茄發挺特艷妝雙出雲
髻鬢有如二女降媯泖翠裙紅袖相牽連岐分駭目

未信宿里傳 耳何喧闐波神有為獻嘉瑞要並太
史書豐年主人謙德不敢有福善自是天行權亭
植立萬花表可人適在亭之前日酣欲語轉嬌姹風
動侶舞欲輕便一時圖寫溢紈素十日車馬空市塵
昔聞莫美曾表異乃因土階與采掾景星鳳鳥豈常
有考信前史真宜傳醴湖蕪塞不復見而今乃濯圭
塘泉禎祥奕葉定不斷藕萬絲縷相纏綿幽人到此
自怡悅膏盲泉石尤難痊要須紀錄入郡乘千年增
重吾山川

侍兄池上對景書懷

閏七月二日

有孚

天機寒燠自潛通殘暑何勞用力攻萬柄荷聲秋雨

裏一窻山色夕陽中初心人未慚青史晚節兄當訪
赤松歲月等閑成老大池亭何幸日從公

可翁和

航船時泛一槁通詩壘誰能四面攻官業向來慚柱
下仙遊隨處是壺中風聲細：來雙檣波影澄：見
七松笑傲滄舟人老矣功名付與黑頭公

楨和

平生心事負清通得失何須較面攻人道神仙游海
上天教宰相住山中四方舊植多桃李三徑新開滿
菊松野老從教爭席坐不須床下拜龐公

晤起偶成二絕

有孚

清風枕簟水雲鄉夢覺槐根百慮忘起課山僮笑多
事飼魚跟藕摘蓮房

松竹平堤飯後行眼前幽事總閑情忘機魚亦如鷗
鷺能識溪童扣檻聲

可翁和

衰病天教遠帝鄉君恩一飯詎能忘但愁今日人輕
議古有赤松無子房

舍則宜藏用則人聖人于世豈無情強顏欲鼓齊門
瑟何以圭塘款乃聲

楨和

乞得西園作醉鄉浮生俗務總相忘水雲清澈荷香

裡小艇虛明似洞房

賦詩舒嘯杖藜行水色山光不世情醉卧午窓誰喚

醒柳陰啼鳥兩三聲

即事

有孚

理檻存茶竈維舟過酒缸水光浮北棟花影在西窓
行樂時休失高飛氣未降相看終不厭庭檜拂雲雙

可翁和

秣田秋半熟香入小磁缸霜水清浮簟烟嵐翠可窓
酒添詩癖重茶戰睡魔降笑問登山屐吾生費幾雙

楨和

映水花明樹浮香酒滿缸上書辭兆闕寄傲倚南窓

處世心無慊論文敵已降圭塘有溪友國士任無雙
圭塘雨後督修堰歸坐嘉蓮亭有感十一日

有孚

瞻此三洲水功輸一歲勤陰留西圃樹清度北溪雲
花竹環隄上亭臺錯水濱每勞賓載酒時與客論文
值雨天相戲修防事又殷潢流誰紀極岸榻我厓垠
水底升船子泥中出此君庀徒紛畚鍤竣事幾朝曛
汎々同援溺憧々劇拯焚感時空付恨對酒豈徒醺
輕薄雲中手艱難鏡裡勲學方知有道境已入無聞
覓句期靈運攻書擬右軍杖從鄉老植序許野人分
調燮功攸屬浮沉意不羣歸來理緇帙剔蠹拾香芸

可翁和

嬾是平生癖歸田始克勤灌園時汲井學稼曉耕雲
憲取山千疊舟巡沿四瀆倦游當稅駕勇退免移文
誰識予心樂都忘俗務殷圭塘清見底銀海浩無垠
潦倒惟營口迂疎愧致君天開方外境塵見隙中曛
酒欲連宵飲膏須繼晷焚讀書覺坐廢娛老却宜醺
園綺知高祖巢由負放勲至人先大節餘事多及聞
詩少慚工部鞋多笑領軍郊原諷歲計風露逼秋分
且曳泥中尾休空冀北羣崇臺還一上萬物正芸芸

楨和

山人新學圃要慰一生勤方沼瀦清水平田種白雲

紅蓮迷水面青草亂溪濱有客須沽酒無錢每嚮文
山中緣已定池上事徒殷小艇通三島新動詩八垠
輕風宜桂棹鳴溜合桐君淨室凝爐篆斜窓映隙曛
荷杯方適用芟製莫輕熱欲發詩書韻仍須麴蘖醺
儘修閑事業休論舊功勳流水心無競蠅聲耳不聞
迹追裴相國詩擬鮑參軍天宇雲無碍溪橋路細分
寒梅花在部野鶴暫鷄羣萬卷書無恙收藏更種芸

鄉友具宴謾成十三日有孚

樂意相閑好鳥鳴可憐歌舞謾多情日斜山氣如雲
氣風急松聲似雨聲落魄不違鄉社飲棲遲須結歲
寒盟圭塘活水清如許不獨滄浪好濯纓

可翁和

相望不隔一牛鳴尊俎過從見至情荷露清涵芳酒
氣松雲寒過艷歌聲高車駟馬初無意白酒黃鷄舊
有盟醉脫烏紗從露頂絕勝前日縛塵纓

楨和

不平常欲以詩鳴詩有還能識此情一座笑談皆有
道滿前圖畫豈無聲鷄豚已遂聯鄉社鷗鷺何妨締
舊盟却笑終軍若多事不攻經籍請長纓

侍兄赴圭塘

有孚

時出西門履信坊望中楊柳是圭塘軒東每被兒童
識風物能令杖屨忙山容荷囊多草藥溪人抄紙滿

鄰牆年來頗識幽棲樂愈覺林泉興味長

可翁和

卜築何如履道坊千紅萬綠浸銀塘要回衰境為全
盛却使閑人號最忙活水清園容膝屋新篁高出及
肩墻烟霞遮斷塵埃路才覺山林白晝長

楨和

清晨走馬碧鷄坊點檢西園數畝塘花柳前川終自
樂輪蹄終日為誰忙釣魚岸口迎新水沽酒鄰家過
短墻半醉莫催翁命駕月明松影引杯長

嘉蓮亭宴罷奉陪泛舟夜分始歸賦詩三十
韻是日之宴渤海縣尹吳安之以使來具也

閏七月二十一日

池亭秩芳筵落日船始放晴空散餘霞秋水淨氛埃
高荷雖離披尚爾綠彌望寒露成壁池不礙雙漿盪
縈紆湛澄碧天宇益虛曠石竇來驚湍松隄俯新漲
鼎立洲嶼連沿洄時一傍飭餽羅珍羞傾倒出奇釀
侑以二名姬朱絃倚清唱凝雲響空翠幽禽或翺翽
所愧杯行遲負此百川量須臾羣動息露氣白沆漚
洒然毛骨輕不獨情緒暢燈火空蒙中仿像江湖上
陋彼西園遊飛蓋何冗長云胡漢陂行亦復怯風浪
而我方扣舷馮虛恣搖蕩吾兄巖鄭流高節張邴亢
少飲如醉翁浮此齋畫舫頗恨交游稀每：折輩行

遂令子弟間日侍屨與杖樓船憶當年樂事炊一餉
望洋失所操伏櫪今在鞅靜言校疇昔所得多所喪
與從天上人何似山中相但恐時易失俛俯異欣悵
錢漢淺且清神槎喜無恙人生貴適意前修語非忘
榜人報更闌列宿光蕩漾故舊東海頭何當剡溪訪
可翁和

膠榮四十年弛擔甫天放雖云在人境心遠絕塵埃
况茲游聘地秋色入四望卉木已向榮雲水自相盪
憲虛得山多臺高知野曠清泉來泊、節制無暴漲
何須過前川園有花可傍玉肪薦肥羜銀瀝注新釀
時貴孺子歌底用小海唱龜魚共游泳鷗鷺來翺翹

并介亦何常小大各有量子房屈圯下高祖隱茫碭
君臣倏然遇功業驚洽暢挺然三杰中奮乎百世上
一朝事辟穀身外物皆長乾坤任俯仰形骸貴放浪
萬事雲悠、一笑天蕩、鶚謝累百篇龍戒上九亢
人生幾兩屐芒屨乃兩舫徒令方寸心戚、復行、
吾年今如此出入必扶杖故人念衰老千里牲酒餉
自鼓烟波泄永稅塵俗鞅境勝夢俱清位失道未喪
誰言管城子初非食肉相興來使陶寫形容豁惆悵
苦吟尚作崇樂飲不為恙學易免大過勿藥喜无妄
厭、詎可極明河月溶漾庶足充淹留何如李公訪

楨和

謝事居山林居隱言不放幕天豁蒼々席地從塊々
 魁然保身哲肯作延頸望舟從飯蠡遊誰復求臯盪
 酬歡酒有時度德官無曠方沼維莫秋清波縮寒漲
 菰蒲相媚媼魚鳥自依傍溪友荐新鯽長須沽村釀
 時間墮麓鳴三歎應一唱賓鴻方叫羣歸燕尚翺翹
 有此家山樂不較江海量朝來試柱笏爽氣亦何碍
 清供既已多幽情自足暢雖居城市間宛在羲皇上
 禮法貴真率服食戒侈長平生事直道所遇非孟浪
 風景晚舒徐郊野寒莽蕩里氓新相知々我匪蹇亢
 清風動綠漪明月滿歌舫竹為君子交梅作文人行
 圭塘策枯藤不用錫几杖散步遵微行晚食謝餽餉

水濱暫彌楫沙頭時棹鞅險語從鬼泣斯文未天喪
 遙々東山遊復見風流香千仞立巉岩衆目駭怡悵
 清泉與白石膏育特徵恙蹤跡諧四休思慮絕諸忘
 洗耳就潺湲拭目明滉漾西山景更多佳處時一訪

借故人趙寬齋胡安禮奉陪泛舟八月有孚

錦幔高張綵纜收畫橈徐動浪花浮招呼版築霑餘

酌時方版築舟過其收拾綸竿作爛遊垂柳如雲藏

一島小橋成徑接雙洲洞簫休品江南曲風月難忘

赤壁秋

可翁和

駭浪船歸百技收回頭人海自沉浮幽閑時作蕩舟

劇疎嬾猶能與客游紅蓼白蘋鷗鷺國清風明月鳳
麟洲諸君更約源、會不泛黃花不笑秋

楨和

碧天如幕晚霞收觴詠從容勝拍浮去歲已為亭下
飲今朝宛在水中遊玉杯酒映紅雲島宮錦袍明白
鷺洲更看波光涵月影人間咫尺是中秋

雨霽冷然臺觀山叶三

有孚

連朝雨云虐今日山却好走馬向圭塘忘餐事幽討
拾級崇臺雲散策芳徑草蘄岩太行巔隱約林慮道
嚙岫紛獻奇高低翠如掃平生頗樂山肯信予髮縞
開襟納浮嵐俯檻看飛鳥不有冷然臺孰覺趙魏小

可翁和

輕風水無波落日景逾好凭虛思橫生萬象困搜討
窮睇眼未花得意詩不草勿謂城郭近下有往來道
心遠地自偏興來無洒掃收藏千鈞弩莫用穿魚縞
悠々歎浮雲翩々羨踈鳥一任坐井徒譁然說天小

楨和

秋容在新晴風物事、好山色可攬掬詩容助探討
西風響疎林晚烟接衰草前溪有小舟何處訪安道
蒼苔淨可坐落葉從不掃松下鶴昂藏裳纒復衣縞
西山列畫圖圭塘賦魚鳥願進一簣功直使衆山小

記塘上草木二十四首

有孚

雙檜如雙虬天賦形天矯蟠根九泉底挺秀重雲表
昨夜間風雷走視寧待曉慎勿變化去須君鎮吾沼

右檜

七松何山來亭下此為萃託根在林塘寔與泉脉會
人生無百年撫倚成永嘒珍重明堂材我但觀偃蓋

右松

曲徑通池亭有此一隄竹瑣碎影搖金瓏瑩聲振玉
高歌淇澳詩宛若淇園綠君其亟走鞭主人厭梁肉

右竹

亭前四梅樹來自江之南易地不易性培植吾所甘
調鼎本無心僵木何用慚且圖慰幽獨松筠成友三

右梅

何年植此栢嘉與雙檜鄰霜雪助孤勁雲烟護輪囷
葉香來彩鳳影曲驚潛鱗服食吾不暇歲晚見天真

右栢

文愀如青幢陰覆釣磯濕又如紫蓋懸高花間紅碧
持竿憇其下烈日爾吾暴猶勝析為枿飽食事博奕

右楸

屋角有老杏枯枝若枯槎春風一披拂蓓蕾團丹砂
董園欲種德花落不用嗟尚憶曲江宴我園全此花

右杏

婆娑合昏木枝葉方敷榮卷舒爾無爽栽培吾有情

紅蕤間層綠團欒若繁纓未能傳嘉樹且飾鳴珂行

右合昏

老樹凍留根生意今始穿薰風能作花猩紅目為眩
結實尤可人纍、采色絢好是無車馬清澈安石院

右石榴

朝陽香霧裡風清露未晞佇立若凝思鬱金捲仙衣
對之不敢褻冠佩但忘歸何吕明高潔圭塘竹日暉

右葵

粲、白玉簪墮自天仙髻約作奇絕花清香偶蘭蕙
蛻形冰雪窟脫身脂粉磴云胡不自持終烏芘薑桂

右玉簪

芭蕉葉可愛移根神廣阿題品待詩客未許僧占多
莖絲真適用花異奈俗何幽人亦分綠用寫考槃歌

右芭蕉

鷄冠子甚微造物巧成就植立意未騰怒長勢如鬥
軒昂自避群尸鄉莫吾購水懷鈞天庭絳幘唱壺漏

右鷄冠

環池有異莧紅壓珊珊樹亦有間鵝黃絢爛五色具
蔬品爾最微點綴秋獨富但恐西風高萎爾在霜露

右莧

西蜀神仙花住此圭塘上春深風日暄睡足錦圍帳
佳人在空谷詩翁有藜杖不須秉燭觀吾方稅塵鞅

右海棠

叢條宛如荆作花臘為胎茅簷曝冬日亦復凌雲開
偶以臭味似冒名百花魁綠葉夏可薦寒泉時一杯

右臘梅

郭西雪一株王郎為移枿月明小院春生意孰可過
粉香花漸衰紅消實堪擬繞樹笑文園何由更言渴

右茶花

青蔥環堦草花發始知萱芳蓮挺孤秀煌々勢如騫
鳳兮何德衰比擬或失言主人酌酒罷嬉笑弄諸孫

右萱

園丁笑麤俗勝地乃栽陶紅霞條如雨作實償吾勞

化工有深意盛時隨所遭易落還易長吁嗟吾二毛

右桃

西堤有穠李照夜雪千堆編裙垂練恍宛若盧家來
笑哦韓蘇詩耻我筵前壘醉後掛冠卧花神莫吾咍

右李

種菊遶圭塘花發秋欲莫零露沾壺尊清香隨杖屨
我非隱逸人却與花有素行看根入池化作甘谷注

右菊

明窓臨晉帖馳杵覓來禽栽培日呂莩用比雙南金
但看花寔時粲若錦繡林鳥食吾不惜毋令蠹其心

右來檜

灼々紅燈花揚州佳麗種主人舊使君當堦自培壅
憶昔金帶圍花曾兆榮寵歸來老圃中相顧腹一捧

右芍藥

層臺秩名品幃幄錦繡張匪徒事富貴花尊有姚黃
歐嘗記洛俗坡亦懷錢塘花於吾有助醉墨洒天香

右牡丹

可翁和

吾家青牛君伯仲龍矯々不似了令威暫來立華表
鬼神護斧斤風霜幾昏曉摩挲左細文曾見陸為沼

右檜

徂徠以多賤吾圃斯拔萃遠從他山移清與幽境會

樂天才四十栽爾已興慨吾年六十三方期翠成蓋

右松

長公有名言不可居無竹僕々劇蒼苔森々植寒玉
聲來書幌清陰入酒杯綠何須更晚食此君當肉

右竹

春風為花魁先路來枝南但憐結成實能酸不能甘
世自不可口根在吾何慚年々共雪月華我徑三三

右梅

蒼官昔多事乃與群鳥鄰何如在圭塘亦勝居神菌
老根已作石霜皮不成鱗不用歎不遇參軍能寫真

右栢

朝來花斬新莫雨墜紅濕藤蘿助奇觀羅波層層碧
昌黎性苦隘政爾蒙幕一笑問秋乎還能誨人奕

右楸

枯樹影在水浮動如仙槎昨日春意開今朝雪滿沙
榮悴等兒戲老懷無歎嗟作實助殺核明年還看花

右杏

有木知尚時手植日向榮無念底用蠲聊用寓野情
亭之轟翠葆毳毳散紅纓青裳勿異字姑以合歡行

右合昏

濃綠萬千枝火齊中貫穿山人晝眠起銀海日俱眩
燥笏行可濡寒裂紋玳絢無賦繼殷元虛塵翰林院

右石榴

曉景振弱體月墮東方晞香塗漢宮額潤展華陽衣
應朝通明殿金杯承露歸道妝豈予媚池影動清暉

右葵

司花琢清貞不掃幽人髻蕞爾草堂陰香軋百畝蕙
月露映冰壺美芳積磴著我沉水香庭前更叢桂

右玉簪

披青羅扇敷陰圭塘阿夏窻雲影厚秋枕雨聲多
翰墨聊復爾風霜其若何休教近湖石掩映美人歌

右芭蕉

異卉非卯生綏纓殆天就驚風振細葉宛若三市門

赤憤不煩憎縛賣孰爾購因之記昔年聽聲趨待漏

右鷄冠

雨後叢甲生俄成尋丈樹誰名雁過樹綵纈無不具
環池爛雲錦吾圃爾富呼酒亟賞之秋光欲寒露

右菟

花仙何許來嫣然立沼上香霧幕曉妝濛：九華帳
勿令苦幽獨就賞時策杖秉燭夜莫歸春去無羈鞅

右海棠

蜜脾持簷葡成此佛面胎黃中色可尚况在雪裡開
盜名非獨我伏神出芋魁幸無鼎調實聊用侑山杯

右臘梅

園丁功力深春榮到由枿花開月更明溶々白雲過
紫實待含津囊承躬采掇莫羨鄴侯燒且浣長卿渴

右茶花

人生念慈親堂堦多樹萱忽隨靈椿化冥漠俱高騫
此憂詎可忘肝摧不能言對花聊自慰白頭還抱孫

右萱

昔人避秦亂川原多種桃我幸遇明世栽培胡自勞
看花食其寔為圃豈不遭疎嬾強鞭策猶勝宅不毛

右桃

清夜遊西園皚々白雲堆東風苦愛惜不遣過墻來
何須頷張澈且復傾我壘茲焉不省錄寧免長姬咍

右李

人間逸逸花開發宜遲莫三徑連松陰百繞穿屨葛
秋容淡籬落寒香入毫素掇英泛濁醪盆甌親挹注

右菊

作甘最夏果其奈招衆禽：咏吾不惜曷酬儻地金
呼童曰歐護青紅獨滿林禽飽人亦飽于烏獲我心

右來檜

造物眷花王擇后降嘉種英華得既多加以人力壅
楚：御衣黃遂冠羣芳寵群芳各有匹勿用曠而捧

右芍藥

開元得四本花本茲烏張衆色各有態世獨推其黃

我非富貴者胡為植圭塘天教風露夜受用一庭香

右牡丹

楨和

雙檜立不倚是謂強哉矯栽培歲月深挺出風塵表
正氣凌太虛老翠宜清曉毫官今何如且復安此沼

右檜

竹樹滿池臺松乎拔其萃根土相安心與景俱會
撫之足盤桓秦封成一嘔相報爾何速裨暑不張蓋

右松

生平癖好幽所至必求竹特開數畝田種此萬竿玉
篩月清影碎出牆新稍綠歲晚淡相看何妨食無肉

右竹

圭塘富春意，益若庾嶺南。策杖時一觀，忍凍吾所甘。自是百花魁，豈但桃李慚。夜來雪有月，照見花兩三。

右梅

池上有兩栢，風烟為四鄰。出根堅似石，挺質圓如困。鸞鳳方託宿，蛟龍未蛻鱗。材大為用難，何如任吾真。

右栢

擇勝植嘉木，池邊地宜溫。化作萬庭花，先看一庭碧。春風播馨香，曉霧為蒙幕。休羨千戶侯，富貴劇如奕。

右楸

仙家杳何許，欲訪無靈槎。春風知鼎竈，滿樹出硃砂。

明朝成白雪，幻花益可嗟。一笑勿多語，孔壇萬年花。

右杏

舍前植奇樹，不日見滋榮。合歡且合昏，有色復有情。晴烟蔭幢節，輕風颭綵纓。莫飾黃金勒，幽人方獨行。

右合昏

愛此安石榴，翠樾受紅穿。照眼欲迷爛，若火雲眩。簪擬宮鬢然，裁入舞裙絢。時見子初成，蒼苔滿深院。

右石榴

園中有黃葵，含露待日晞。玉人宿醒起，澹妝宜道衣。戲把琉璃杯，西風醉忘歸。檀心不自揜，盡展向晴暉。

右葵

素娥宴仙家醉歸鬆寶髻遺簪孑作花清芬不讓蕙
夜涼小窓陰回風轉香磴相伴何人斯古香老桂
右玉簪

芭蕉我所愛移植庭之阿綠章封事少羅扇清涼多
秋窓一夜雨繁響如愁何明朝就葉上寫我短長歌
右芭蕉

有卉如雄雞赤玉巧琢就不聞長鳴聲對立若期鬥
衆葉方離披千金不可購報曉弗用爾高眠謝更漏
右鷄冠

腸胃喜蒸菹培植乃成樹紅紫葉為花青黃天具
矮籬秋意深小園晚景富鴻雁殊未來西風送清露
右菹

我愛花中仙時到池上風破胭脂粒烟作雲母帳
睡足曉光遲幽人方倚杖何用遊西川吾園堪掉鞅
右海棠

銅切黃金塗中色為胚胎不用較名實俱是東君開
幸廁丈人行敢作羣芳魁何妨對磬口時復傾金杯
右臘梅

微雨濕鉛華芳妍滿槎枿東闌昨夜風飛雪不容過
小圃未闌珊佳實行可擬人生幾清明一醉忘飢渴
右茶花

人生有所寓北堂惟執萱翠蓮裊鵲并丹葩驚鳳騫

芳潔宜蘭蕙忘憂復何言宜更男有驗常伴竹生孫
右萱

武陵不可到吾圃自宜桃作實可立待區々匪徒勞
蒸露紅縹渺流水紅週遭便須酌酌醉萬事輕鴻毛

右桃

晴雲映穠李萬事繁如堆葦綃暖日透縞袂香風來
搖落亦可人紛飛入尊壘肝膽醉不邪恐為玉川吟

右李

種菊滿東籬徘徊風景莫采之不盈握草露濕芒屨
無酒只餐英安分行吾素懷哉斜川人停雲自空注

右菊

嘉果味何甘得名因致禽美質瑩如玉珠砂點黃金
芳譽留晉帖作貢稱文林青李勿相違作詩戒遐心

右來檜

當階種芍藥美麗非一種紅紫鬥嬌艷風雨勞蔽壅
甘作春光殿乃專衆芳寵對花當若何金鍾日須捧

右芍藥

花王元富貴造物更鋪張列檻紅間白擅塲紫配黃
吾園足花品獨爾張林塘今日好風色滿天吹暖香

右牡丹

池亭苦雨松竹皆黃書事有孚
驚見黃萋及七松徑傷竹亦不能叢怨咨固是小民

罪位有誰虧大造功濕氣連天雲易雨秋聲撼地日
恒風圭塘草木渾閑事可惜郊園未黍空

一作挽回
生意須開

霽晚節冥
藉太空

可翁和

誰教淫雨害吾松更偃寤前竹幾叢晚景盟桓方取
友經年培植已成功堅真未許移天性光霽行將藉
曉風珍重歲寒心事在却憑孤月

楨和

點綴池塘藉竹松：方挺：竹叢：上天何事連朝
雨老圃都淪一歲功生意此時須曉日秋聲何處又
西風歲寒節操誰能易三徑佇看青滿空

圭塘草木續詠六首并叙

楨

從父都司先生記圭塘草木詩二十四首句精
意足體正法嚴楨也偕和嚴狎具藁既進而竊
有疑焉夫仁人君子之於物雖大小不同所以
與進造就之心則一圭塘草木皆先生培植之
功草木之獲至圭塘亦皆先生進拔之力也然
有不得在吟詠之列者豈非已圭塘唱和嘗及
之耶抑亦有所遺忘耶梅也松也竹也柳也荷
也嘗及之矣而梅松與竹今茲又蒙專詩柳與
荷不與焉况若槐之植德桑之濟世椿之靈壽
榆之適用而皆棄之六者有知將有憾也謹續

為之適用而皆棄之六者有知將有憾也謹續
為六詩共前為三十詠偕和之罪伏干寬恕教
誨斤正又有望焉

昔人植三槐百世猶青々所貴德充符豈但陰滿庭
黃花兆舉子厚蔭生公卿不見王祐家坡仙有堂銘

右槐

有地悉栽桑豈但謝墻下修條蔽麥隴綠葉茂夏
欲作成都謀敢比齊魯野老人無贏餘衣白樂鄉社

右桑

我觀木有椿何異人而仁々者必有壽此木宜千春
栽培幸成趣佳兆在主人主人信不俗植桂為之鄰

右椿

我山隈有榆移植圭塘上歷々近仙家夾道起尋丈
春火生青烟晚景尤可尚莫也雖無才不似楊花蕩

右榆

此柳何風流栽插徧庭院才抽綠玉條便散黃金線
弱體不勝鶯纖腰似飛燕心事如淵明但比五株羨

右柳

引泉瀦為沼種藕才一年紅妝映翠蓋水晶宮裏仙
凌波踏明鏡捧擁來三千應同娛野逸莫教閑酒船

右荷

翁用楨韻

涼颼動空碧修枝振高青張幄却炎暉交陰可中庭
不煩位三公政爾宜冷卿南柯莫記夢陋室方為銘

右槐

幽人非浮屠日戲桑下愛其濟世餘重綠庇朱夏
昔賢事游觀竹木翠綠野繼踵吾不能但入老農社

右桑

靈木享遐筭異質稟至仁後先八千歲才是秋與春
蒙莊發揮後塵世閱幾人吾材實樗也賴得爾相鄰

右椿

託根鄉社間遠跡閑塞上春莢羹萬錢大勝食方丈
東隅何失之收之敢高尚歲晚但相看萍蓬謝飄蕩

右榆

依：裊長條漠：迷小院縈風輕作綿穿露巧如線
不復管別離招鶯更留燕會看成車蓋吾圃有餘羨

右柳

華部愛君子移栽未逾年生意自營達主人豈花仙
初日爛雲錦靡漫知幾千遠觀敢褻翫柳陰維小船

右荷

叔和楨韻

高槐殊可愛容葉屯雲青閱市遊胄館過位揚王庭
秋風適作花植德資墨卿得意十二街斯語心當銘

右槐

樹桑五畝中畦流遶其下遠揚看深春沃若羨初夏
願言敦本心毋使質勝野勗哉王道成鷄豚樂吾社

右桑

圭塘挺嘉植雨露涵深仁一株尚未老八十有餘春
陋彼擁腫樗娛我逍遙人託根况得地寶樹為芳鄰

右椿

晚年樂粉榆好景更池上夾道不成籬清陰通函丈
改火歲所資食皮何可尚勿逐春風顛青錢給游蕩

右榆

春從何方來綠我楊柳院東風巧亦甚槎條畫成線
願學榮桑翁幽居樂間燕飛絮任為萍樊圃折其羨

右柳

愛蓮比君子鑿池憶當年風月夜光霽靜對凌波仙
亭々葉無數粲々花幾千花嬌葉可製寧詫藕如船

右荷

憶梅

十二月四日風雪
大作時在陵州

有孚

為憶圭塘四樹梅不知別後幾枝開狂風惡雪急如
此嫩蕊疎花其殆哉青女未能將暖至翠禽端為問
安歸期咫尺春光好慰藉冰肌有玉杯來

可翁和

孤高貞勁愛江梅歲々凌寒雪裏開疎影在窓雖偶
爾暗香來座本奇哉西園老子巡簷去東閣佳人覓

句來莫聽高樓風外笛且教檀板侑金杯

楨和

河北高寒少見梅年々吾圃有花開深紅淡白非偶
爾對飲狂歌亦快哉京國故人成夢想鄉閩驛使寄
書來歲寒冰雪相看處却似同持瑪腦杯

不寐有懷圭塘明日遂行初九 有孚

幾夜陵州枕圭塘入夢思凍消梅早放春近柳先知
涉世元無策還家賴有詩促僮勤秣馬詰旦是歸期

可翁和

去我才旬日渾如久別思劣兄恒在念難弟亦還知
且飲團樂酒徐觀跋涉詩梅邊松竹茂好共歲寒期

楨和

極目鄉關遠臨風有所思莫疑歸太晚祇恐負相知
縮地思奇術懷賢和舊詩石鯨流水處餘響負鍾期

十二月廿又二日觀雪冷然臺城郭山川四

顧清爽小兒誦東坡先生聚星堂詩甚習殊
可樂也因憶馬明初云往歲德常杜左司嘗
與諸公和之成巨軸然皆不及一見僕則不
敢言和但對景乘興謹用其韻爾僭越之罪
觀者恕之 有孚

花飛六出亂無葉冷然臺上偏宜雪茫茫大地迴無
塵渺予懷正奇絕山容喜從天際改竹聲時聽池

邊折相知更有灞陵翁長途不信人蹤滅平原飢鬼
巧踰藏空濶蒼蠅飽飛掣小兒忍冷從吾觀楚々
裘蒙采纈坡詩誦得聚星堂字々珠璣飛玉屑懷賢
撫景感慨生歲月堪憐去如瞥豐年但願太史書故
事須從汝南說歸來舉似宋廣平却笑梅花心似鐵
時梅皆
凍損

可翁和

松花仙釀香浮葉邛君醉詠冷然雪停杯撫景誦其
詩韵與天花兩高絕移床坐對西湖仙撚吟不覺冰
鬚折恍疑身在瀛海中得句驚寒塵全滅懷賢未免
失自量韞線長鯨溟渤掣天孫絢爛雲錦裳小點難

儕江表纈呼童掃付石鼎融調我療飢雲母屑憑高
凝睇縱遐觀正爾龍公自飄瞥當時後學俱云左
司巨軸知何說效顰自笑亦續貂始信心腸非石鐵

楨和

朔風捲地飛雲葉山川一夕埋深雪冷然臺上望眼
迷大地茫茫正愁絕西崦深藏茅屋低高崖寒壓松
枝折雲間日脚漏光垂沙尾山腰互明滅蓑笠漁翁
獨釣歸村館青旗風颭掣一段清竒畫不成衰顏得
酒紅如纈書窓忍凍捨枯薪庭除泥淨陳木屑樹抄
飢鴉晚羣噪平田脫兔時一瞥豐年有兆喜欲顛模
寫成詩費騰說呼童沽酒當一醉巨筆如椽鋒似鐵

圭塘補和并序

款乃既歌之明年熙如京師可行洎楨曰侍安
 陽公觴詠圭塘更唱迭和詩辭凡二百四十有
 九又明年楨來京師熙始得伏讀全集大篇雲
 行短章泉流無非樂日用之常而憂國憂民之
 實亦未嘗不默寓其間也楨聞詩趨庭日有新
 益而熙乃以抗塵走俗不得與于斯文愧可勝
 言耶然可行序引有張本同聲之說固欲援之
 入社今雖未至未必峻拒之也于是忘其蕪陋
 勉強補和得詩七十八詞八錄次左方惟二先
 生進而教之

可行圭塘雜詠二十四首

作樂導水

水生天一本微陽樂以充陽落此塘伐鼓三聲泉破
 甕和鈴萬古發央央

携妓落城

省事山翁許鶴隨燕鶯奔命為誰疲情知款乃多幽
 事不付樵青付雪兒

柳下聞鶯

出谷遷喬早致身友生求舊復求新不因萬樹黃金
 縷肯向園亭漏洩春

舟中對鷺

造羽曾聞襍衣裳
圭塘今見雪疑妝
詩家物色無逾
爾身與虛舟已兩忘

荷觴酌酒

輕柔圓淺勝琉璃
珍重山人有當卮
若刺玉簪成象
鼻翠濤雖滿不淋漓

蕉葉題詩

少公飲量過三蕉
詩思如抽岱嶽毫
百摺翠雲題欲
徧獨留心葉待秋高

荷淨納涼

凌波萬綠可無床
水國風來體亦香
焚製裂衣殊未
暇從教鄉原笑涼

開窓看雨

洞房編葯屋編荷
八面玲瓏得月多
誰遣天飄簫雲
過嫩涼扶我入無何

松陰獨釣

露髮雲花落繡茵
一竿聊復坐忘真
大夫亦記當年
事風雨中宵念潁濱

與客泛舟

邛友相須邛鼓棹
那堪舟子亦招招
喚回十載江湖
夢雲際參差起鳳簫

日夕觀山

甕牖儀刑畫翠巖
自移一榻對晴嵐
山中雲出乾坤

雨恐有賢書到水南

西隄晚眺

偶然隨柳涉飛橋
淡本無心與泊
遭落日蒼烟橫白
鳥西山秋色兩相高

雨中移竹

移花嘗築避風臺
移竹應難就日栽
此夕相邀愧泥
濘明朝冒雪試重來

月下觀梅

雪後西園路踏沙
一枝曾挂酒壺斜
只令午夜扶疎
影却屬山中道士家

倚檻觀魚

洋：圍：校人知慚愧
公孫獨受欺老子臨淵非羨
汝謂予不信質之詩

遠堤種菊

芳叢種與老仙看
春葉秋花不用餐
但使幽香入池
水年：初度酌甘寒

竹間開徑

龍孫戴：亂穿苔道古
端由剪伐開不向此中常徑
造款門無處可裴回

水口聽琴

琴忘流水：忘琴：水俱忘
是我心甚欲囊琴室流
水柳陰跌坐聽希音

獨坐投壺

競物無心每負壺、能負我亦堪娛
偶然中爾成驍箭絕似檀溪躍的盧

登臺縱目

疇隴從衡草樹低
西山東郭共冥迷
若論攬盡源頭水合姓洹溪作許溪

調白蓮始花

水鄉紅紫盡與臺獨爾懷冰犯日開
群玉有詩無乃戲卷雲須辨雪千堆

調木芙蓉不花

欲辜騷鄉木未蓮繞池分種待秋妍
都緣錯把東風

怨花似寒灰不復然

調石湖

奇章三品藐魏良嶽將軍視賜緋
何似野棲娛退傳苔為冠屨草為衣

聽箏

春纖無力發弦輕助以半天風雨聲
詩客凌雲渾未覺六絃心醉有餘醒

可翁酒間口號

塘肖圭乎圭肖塘幾人勇退水雲鄉
韓優白劣都休較凜、清風不可忘

楨侍圭塘飲

相下者英繼洛陽詩如趙璧責秦償二難獨擅文章
氣一字不隨時世妝洗雨芰荷方出色充庭芝樹亦
生香黃塵烏帽予多愧不共尊前此夕涼

可翁太常引四首

園池多在魏公時盛極自然稀天遣可翁回要扶起
臺傾榭歌圭塘如此藕花無數一笑領翁詩帝里
不須期怕鞞似三司面皮

園中風物水中亭消得兩娉婷濁酒卷荷傾早寫盡
箏聲笛聲四隄晴柳一天花氣付與晚山青飛絮
挾雲輕任膝上瑤琴自橫

穉紅酣日照修筠光景一時新萬扇却游塵看出浴

溫泉太真榜中龍虎班頭鷓鷯無復困冠巾花亦

識天民間身到黃扉笑人

露桃雲杏不勝穠合讓水花紅別種出林東為冰雪

相看改容涇堂雙瓦此時千葉愁絕閱珠宮貯酒

待吟翁念疇昔時來一中

可翁圭塘獨坐四首

投老歸歟屢有年西南况復罷籌邊且容獨樂着司
馬何必五湖追計然激濁揚清勤潔井任輕求重嬾
芸田悠々此意誰能會倡入漁家傲四篇

近日証商法不塵謀生徑欲買烟村有錢得酒亦種
秫無錦可裳仍集蓮和露任誇桃樹開因風不禁柳

花顛漫郎心事歌能寫樂句從知在此舫

園池多勝事有間即逍遙祛暑衣蒙葛揮塵扇却蕉
波光搖屋角樹影轉廊腰何事西窗外青山不受招
水濶憐亭小隄回覺路長烟霞鄰道院花木勝禪房
漢徇烹韓信秦鷄脫孟嘗客來如語此未免浣吾塘
可翁謾書

紫圍三年夢圭塘萬古心卓亭仍就日寒向欲排陰
世路茫：濶天機袞：深倡酬詩百卷誰遣到雞林

可翁有舟

勿謂吾舟小輕于太乙蓮能容茶煮竈更載酒如川
有分投閒散無心外蹇連若教仍濟險須問水中天

可翁大雨兩晝夜僮報墻仆而竹茂

床、屋漏若無乾一夜周垣被水漫生意盡歸叢竹
底涉園須待日三竿

可翁雨後觀竹有墜墊摧折者

雨前栽爾地猶軋急雨排墻爾遽漫愧爾蒼黃類夷
甫未能忍死待鷄竿

可翁新秋即事

秋聲無適莫一夜入松闥不待歌高頌先期賦小山
間情凭綠綺機事失黃間望斷雲林鶴馳書久未還

可翁秋陰

螢飛猶惡濕鵲噪未聞乾栽竹心逾遠澆桃興已闌

有坊鄰履道無路達長安欲和陽春曲詞華愧二難
可翁漁家傲四首

香霧空濛烟縹緲青鷗林木先從杪若采芳洲繁采
沿花事悄幽情聊復忘魚鳥
：倦知還亭月老魚
安淺碧吹斜照魚若有言求直釣秦吉了也應能唱
魚家傲

八十鄰翁頭似葆為言環翠埋荒草不侶圭塘風物
開清晝好來游往々逢郊島
細浪粼々風嫋々柳
絲柔直荷錢小鳧短鶴長無用較舟可棹扣舷重和
漁家傲

涼入槐陰門巷杳秋容次第踈蘋蓼潦盡波寒亭影
倒征雁早一聲喚起江天曉
菊外白衣殊未
隄留得西山眺何事木蓮花獨少詩與調倚風仍度
漁家傲

池上水枯根岸峭池邊雪霽無行道三島遙々心欲
造舟子誚拏舟恐受堅冰笑
遵渚一鴻方矯々古
饑雙鶴從形槁吾亦安能充爾操惟善寶歲寒歌徹
漁家傲

可行瑞蓮歌

休官林下堂名洹觀魚今又師鄉賢軒前未暇植他
物清漪萬頃花開蓮凌波仙子弓鞋濕御風毛女雲
鬟鬢就中一朵特獻瑞蕊岐蒂並房仍連里人傳繪

筆幾充郡官趨慶門應闈三陳秉軸昔接踵二宋射
策嘗同年當時豈無草木祥水花未必曾司權平輿
施厚報未食相臺雙桂宜光前歲寒勁節各挺々傳
家經笥均便々伯兮勲業在廟社用藏功歛安受塵
季才本是棟梁具胡不領秀稅與椽登庸便合踵舊
轍天公有語令花傳洹堂嘉貺又繼出慶源袞々逾
淵泉階庭連裡見玉樹合歡不但瓜繇々嗟予病減
誰復病探囊試藥猶未痊誦公新句弗克和飽觀紅
日酣平川

可行對景書懷

池上墳荒協四通毋勞種木互撞攻詩生流水行雲

外人在光風霽月中路到迂時因避竹垣從境處更
培松世間何地無魚飯此日委地勝自公

可行睡起偶成

園池擇勝似江鄉蕉鹿何妨爾汝忘不是扣舷歌款
乃更從仙枕覓山房
雲入茶甌自在行風生竹牖更多情石渠近日添新
雨膝上橫琴聽水聲

可行即事

載書逾十乘儲醬乏千缸竹影明窺戶荷香暗度窻
對山方目擊見客又心降落日層臺表蒼烟白鳥雙
可行雨後督修堰歸坐嘉蓮亭

謝政從憲懶持家有弟勤鑿池通活水築島駐行雲
柳外渠穿石荷邊路迫瀆亭臺全尚象蒼竹間成文
月畢秋仍早星虛氣未殷霖淫寧有節洛洞遂無垠
畫舫齋居士黃樓賦邠君水平池見岸雨歇日窮曛
竹塾茅新濯魚飛尾舊林計庸書載其犒役酒仍醺
境順多逢坎時難好策勲一勞知永逸萬事付無聞
折簡常招客裁詩足張軍樹容黃鳥竝屋讓白雲分
人樂宜居獨天謀欲換群明朝又興作菊徑荷鋤芸
可行鄉友具宴

石溜穿渠瀧鳴眼中幽事總閑情故人載酒不盡
醉好鳥隔花空有聲但使軒扉常款客不妨松菊屢

尋盟西風瘦馬長安路說與山靈笑絕纓

可行侍兄赴圭塘

年來夢斷鳳池坊雲影天光有此塘夜飲不辭歸路
遠晨興更覺攬衣忙桑麻莽蒼接平野機杼咿啞聞
隔牆忽有好詩生馬上眼明雙檜拂雲長

可行宴罷泛舟三十韻

仙舟夫何如快逸且奔放蒲帆濯沅瀟桂棹却氛埃
西塞辭予真甫里謝魯望秋雲與飛揚春波恣摩盪
濟人功已歛橫渡臧非曠願陪山翁遊况值新雨漲
荷深知渚澗花虛見雲傍鄉閭速佳賓渤海致名釀
影搖雙檜舞聲發半天唱柳鶯續紆餘松鶴助胡顏

滔々劇川吸湛々豁波量光迎東月皎氣挹西顛碣
聯句交彌明請序接文暢吾將出方外彼亦可舟上
空虛名共逝俯仰物無長猶存一釣竿欲破萬里浪
霆轟彭蠡澤風擊黃天蕩又虞險難乘或致身弗亢
不如謝蒙衝聊復娛此舫旅酬賓主席各逮子徑行
全交忠罔極尋盟信可杖使乎杯勺免翁以鷄黍餉
神龍豈容泰天驥俄脫鞅醒醉既兩忘罷辱亦俱喪
茫々跡大禹表々州古相休逸猶可追觀魚已堪悵
更長幕無烏月黑草有恙孤蓬憩雙漿一夢絕諸妄
明當沂滄浪高歌航漢漾仍究圭塘泉乘槎洹水訪
可行偕故人陪兄泛舟

紅衣落盡渚蓮收容得虛舟日夜浮二客從予非謾
與一尊邀子助清游偶然憇息來三嶼從此翱翔到
十洲欲賦棹歌成慷慨淡雲疎雨不勝秋

可行登冷然臺觀山

林慮山本竒臺上觀更好宛如武庫開事此軍實討
千矛插層空萬戟立荒草弓戈紛委地盾劍光夾道
端能愁城攻亦可詩陣掃佳人澹相對綸巾照雲縞
緬懷湘水湄衡嶽配朱鳥惜無冷然風筆 祝融小

可行記圭塘草木二十四首

亭前雙檜立枝曲能自矯譬如直諫臣抗論紀天表
氣含芝木春節礪冰雪曉丹井有餘波挹彼注茲沼

右檜

歲寒撫青松觀此物情萃不有蛟龍形孰當風雲會
寧隨陶徑菊日以荒自慨不願汗秦封為作擎雨蓋

右松

移家傍洹溪辛苦嘗為竹植之永為好寸土如寸玉
逝從篔簹偃化作渭川綠中有鳳笛材清音勝絲肉

右竹

昔年探梅花携酒過水南今茲對池上嗅香當清甘
楚騷難見遺吾林亦何慚但恐和鳥晚頃筐實餘三

右梅

柏壽以世計當與泰初鄰銅柯既盤：黛葉仍困：

雄姿扶龍虎奇文間織鱗歲晚同

操甚知丈人真

右栢

河濟富干樹性本樂卑濕釣磯有餘地借爾油幢碧
繁霜剥其陰忽若尊舉幕致身安樂窩猶能大觀奕

右楸

杏園千樹春年：送仙槎如遇黃扉人飛雪漫隄沙
移根文茲土開晚慎勿嗟但願世其文嘗觀曲江花

右杏

有木枝葉繁茂蕤蔽前榮作止每因風離合非其情
名器不可假：爾一就纓為爾解蠲忿示我亦周行

右合昏

若榴屯於春入夏氣乃穿花能醒醉眼實可清暝眩
點紅亦何心要作濃綠絢但為宜男房煌煌照庭院

右石榴

黃葵本高潔值此湛露晞
切雲冠飄飄六銖衣
中色足自媚吾將田園歸
佳人殊未來忘言對斜暉

右葵

遙憐章甫冠贈玉簪我髻終當衣製荷未可悵空蕙
茉莉如搔頭配爾香磴胡不來中州而乃宅八桂

右玉簪

甘蕉本靈苗劇根出崇阿
狂僧萬猶少道士一已多
中宵聽風雨詩富如葉何
茫茫夢中鹿倚窓聊寤歌

右芭蕉

秋花轟雞幘纓武凡幾就感錦豈欲鳴碎丹或能鬪
新詩繼歐梅已受賈人購
暮予乏雄辭雌伏愧屋漏

右鷄冠

吳興執白菟欲以清自樹
此種備五色充庭當家具
葉披錦雲亂實餐系珠富
霜隕不足惜明年有春露

右菟

銜字定黃鵠孰為來海上
紫錦飛莫簾纈暈點春帳
照妝待銀燭追香負筇杖
明當走昌州爾勿斷予鞅

右海棠

春風何許來孕此黃玉胎
蜜脾不自罄口何由開

以貌可梅僕論香亦花魁風味極不淺吾當舉深杯

右臘梅

天公琢瓊瑤一夜綴萌蘖遂令東闌雪不受薄寒過
淡妝何用洗落英猶可掇安得丁坐人相與浣塵渴

右茶花

主婦治北堂所值惟貴護抗葉驚四垂擢英喜孤騫
稔合叙其功無成乃卮言當持忘憂訓問我亦重孫

右萱

何彼穠々花浩歌園有桃陽和不擇地人力寧施勞
舊植各天涯或又元都遭惟爾足佳實差之配溪毛

右桃

園林淡泊春有此冰雪堆赤日照未好月夜須重來
逝將濯其根致之洗與壘顏色勿慘々恐為梨所咥

右李

秋容為誰妍白衣來何莫不惜尊中酒恐負籬下屢
霜風掃頰紫星月照黃素采々晚節香美人意方注

右菊

花高枝滿蝶實老田有禽風日不貸春吾囊已無金
誰將亥譎永致爾來為林不有右軍帖疇爾沃吾心

右來檣

嘗徵廣陵花腰金本無種其當異人出嘉瑞不可壅
西園有分根新雨荷天寵顛披家慶圖觴為吟伯捧

右芍藥

知花在根撥培養異池張媒暖真叢棘穴蠹簪疏黃
主人本無心聊復雲影塘端誦康節語輔車有餘香

右牡丹

可行松竹皆黃

淫雨為災及穉松黃萎又見竹身叢徒能醫俗不自
療謂可引年寧有功外直尚持君子節後凋終繼烈
臣風人將大任終窮困其孰知之惟太空

楨圭塘草木續詠六首

白槐餘十年老眼冷復青萌蘖迤春雨一：碩且庭
平生邁種德不但保彥卿我將如其花高誦休哉銘

右槐

國禮嚴公桑蓋有勤率下采：為殘供衣破溥夷夏
何年樹獨樂花竹共秀野當令有餘帛足辦里中社

右桑

惟木首五行實配四端仁椿又木之首配時為孟春
春當歲八十此語聞蒙人仁者必有壽老境願卜鄰

右椿

仙家榆尚白歷：種天上此地敏其青毫未起十丈
蕪莢抱美材胡為食弗尚戢：風雨裁生意尤浩蕩

右榆

杖屨迷柳邊無乃似歸院不如棹孤舟沿堤纜其線

朝絮粘露蜂夕條棲雨燕與物同致和天恩殊曼羨

右柳

鑿池得枯荷斂迹不記年一朝出淤泥亭水宮仙
遙憐構巢龜欲問歲幾千便當從太一暫借紅葉船

右荷

相為中原名郡自昔多達官貴人之居宋廬陵歐陽
子為丞相韓魏公作畫錦堂記人到于今稱之由魏
公而下雖懷黃曳組亦不乏人求官簿問望政事文
章一切烜赫於時功成身退又能歸享太平之樂者
則亦寥寥如也御史中丞安陽許公以徑術起身致
位尊顯卓為一代名臣晚歸相城視聽不衰闢園作
室引流種樹日置酒賦詩為娛樂清風雅致照映後
先歐陽記所謂少擢高科仕宦至將相富貴歸故鄉
築堂營圃作詩以遺相人一一皆似為公言者始知
魏公之後繼其美者未必無其人也然則圭塘畫錦
之名當相為不朽於相矣若夫公製作之妙天下人

人之所矜式舊矣是集又若老將用兵百戰百勝而縱橫變化無不如意顧區區者何足以窺其營壘也哉學生汴段天祐再拜跋

安陽公以道德文章名重一世及功成身退相羊雲外之間與松竹居魚鳥游暨其弟若子更唱迭和金石相宣若身在六合之外遠乎不與世接其賢過于人遠矣哉公於溥為父執都司君長溥年事之若兄國子楨少溥年接之若弟往者嘗拜公於堂侍都司君于客次揖國子楨于大門之外未嘗不僂偃側辟俛而服仰而歎也圭塘康氏之廢園也當其廢時過者不視牛羊萃焉庸詎知今日之過乎鑿之薙之築

之樹之挈子弟而招佳賓圭塘過矣庸詎知後世之傳乎非公則圭塘不過圭塘之傳則有賴于款乃也與至正庚寅孟冬望後二日晚進龍門周溥頓首再拜謹跋

唐國子司業楊侯以年滿七十白丞相去歸其鄉朝之公卿士庶共稱其賢昌黎韓子有文以傳于後世以為美談御史中丞相臺許公以年老亦白大夫而去當太行之麓洹溪之濱得地數十畝築亭鑿池深廣有度樹以松竹杞梓種以菱芡夫渠水綠掩映雖極人力每雲收雨止層巒獻翠活水分清儼若天鍾其秀公率子弟或舟楫或杖屨蕩颺乎清流徙倚乎

亭之左右更相唱和殆無虛日歟乃一集鳴于時不知楊侯之去有是樂否今世士大夫宦遊中外老歸于鄉者有之矣得山川之勝而燕遊者則鮮也得山川之勝而燕遊者有之矣第若予俱能文辭者則鮮也公以明經擢上第致位廊廟佐天子出政令幾三十年膏澤被于民物者固多諸福之美萃于一門天之施于公也實厚相之人凡出處去就一旨鄉先生為法是集之鳴也益著衆所謂賢者又不得專美于昔矣至正辛卯冬至前五日詩生哈刺台再拜

山川景物因人而勝因文章而傳人品既高文足範後山川景物之得所託而傳于久遠

也可必矣中執法安陽公歸鄉里作圭塘位置之巧泉石之勝松竹荷柳之繁亭臺橋舫之具西山如畫公于良辰美景挈子弟招賓朋觴咏其中宛然香山池上也觀物賦詩殆無虛日積久成巨集圭塘之勝遂聞四方製作之精人願矜式不然則圭塘雖美孰能盡知至正庚寅夏文昇過相州獲拜公於里第陪杖屨一遊來京師日奔走思昔陪侍恍若夢寐癸巳莫春至鯨川訪尚書積素成先生邂逅洹濱御史于餘清軒中適二公對方冊談論驩洽文昇從傍竊觀則圭塘唱和集也

思得掛名集末豈不容幸遂領歸旅邸而手
鈔之自不愧其字畫之荒惡也謹以歸于涇
濱為後游張本云孟夏天台了文昇拜書

衛之詩有咏歌夫碩人之寬而著于國風者考槃是
也有以父子兄弟一家而皆善于詩者三曹是也然
而考槃之樂美矣徒託諸他人之咏而見三曹之詩
多矣而其私情中紛嫌隙相逼不能以盡夫忠厚和
平之樂是皆得于天者或不足于人有其文者或不
足於實於是而知中丞公兄弟子侄圭塘唱和之章
從容怡愉之思蓋古今所僅見者也中丞公世家相
州相州衛地而三曹之舊都也中丞公與其弟都司
君皆以蚤擢高科仕宦中外未嘗少休于家所謂園
林池榭之勝優游野服之樂徒形諸懷想而寄諸渺
茫一旦兄弟同得以遂其情焉則其同氣相親同德

相與發諸歌詩詞韻之門自將宮商相宣金石相和
大篇短咏交唱迭和有不能已矣然則衛地之詩此
非尤備尤善于前人乎雖然發言為詩聲之和也兄
弟既翕家之和也以和兆和將見如歐陽公所謂園
間^之草木有駢枝而連理禽鳥之翔集者不爭巢而棲
不擇子而哺豈特可稱于高陽許氏之東園哉臨川
黃昇敬書

細讀圭塘唱和詩風流餘韻想當時東山絲竹閑方
得北海樽罍老更宜亂後池臺渾索寞夢中松竹亦
參差樓輿不晚歸枌社願校園丁 舊基

至正甲辰諸生袁邑趙恒書于大都南城之

寓館

昔宋張文定公齊賢舉進士仕太宗朝不十年拜相
致政歸洛陽得裴度午橋莊鑿渠通流栽花植竹日
與故舊乘小輿携觴遊釣嘗賦詩曰午橋今得晉公
廬水竹烟花興有餘師亮白頭心已足四登五府九
尚書今觀御史中丞安陽許公謝事歸以賜金得康
氏廢園於相城之西剝闢朽壤剪焚榛蕪涼臺燠館
古木詭石間厠隱顯復鑿池如桓圭形號曰圭塘公
野服蕭散乘棹輿時與畸人靜者偕其弟若子觴詠
其間攄幽發翠更唱迭和金石鏘鳴累巨帙題曰圭
塘款乃公之弟可行時為南行臺監察御史與公皆
以名進士顯宦中朝清節雅望輝映後先子楨復以

門公起太祝供奉玉堂其懸車之樂視文定公宜不
多讓而風流文采萃于一門蓋有文定公所不能及
者謹拜首題卷末識歎慕之私云諸生鎮陽張守正

右中執法安陽許公款乃集一帙觀其所載園池之
勝遊賞之樂無非所以形容太平之風致至于更唱
迭和金石相奏而律呂相宣乃與其弟太常君洎子
楨供奉出于一門昆季之賢并群從之才俊有非他
人之所與明時國家人才之衆多教化之隆洽因是
而可以槩觀焉金臺王翰謹跋

中書左丞安陽許公洎弟太常文章政事名滿
天下每嘗想慕風采至正甲辰愚叨掌故得親
太常公一日出示圭塘唱和詩集迺左丞致政
太常以南臺御史還家兄弟暇日讌集圭塘亭
榭時所作也一唱一和珠玉輝映奉讀之餘則
賢人君子棣華之樂可想也遂成俚語一章用
贊萬一云

宰相歸來致政時圭塘唱和類篋壘好山好水天開
畫難弟難兄日賦詩酒滎每從花塢設釣舟時傍柳
陰移景因人勝千年下綠野香山未足奇


山東陸煥然拜

至正癸卯余奉使嶺南丙午自瓊儋回屆相時太常
禮儀院使許公可行奉旨來尹相省故園之樂也余
亦忝列兵曹得陪許公于斯一日得閱公囊侍兄集
賢大學士可用公洎侄元幹廣唱圭塘唱集嗟夫人
家孰不願一門父子兄弟忠孝之全德學之備榮宦
之隆哉造物有所僅吝亦人積善未周弗膺于時矣
若斯數者許門之樂全矣嗚呼公今之來松愀恪恭
田園得意復繕圭塘修榮叢桂對西山而酬興臨清
流而賦詩相知栖鳥適趨芳徑策杖從容且歌且樂
軋圭塘之舊發潛德起幽光遂平生之高志樂好景
黃花若韓魏公胡子山王西溪各賢不獨專美于往

而許公一門躡高風于後誠不多讓矣若夫麟閣勛
名玉堂舊業公無夢矣余何人哉得密邇于圭塘耕
耘也耶浚儀王國寶拜

右唱和集一帙江湖友人躬錄而裝潢者二十八年
矣南歸展讀中雖無恙而外皆破碎可憐况兵後所
存惟此本爾乃力疾補葺遺我子孫永收翫上章涪
灘歲夏四月初吉涇濱識

道光四年閏逢泥灘孟陬借葉東卿所藏淡宜書屋舊鈔
本錄藏于味經室 喜海



書